

# CBETA電子佛典集成

---

CBETA Chinese Electronic Tripitaka Collection  
eBook

T14n0477

## 佛說大方等頂王經

西晉 竺法護譯

# 目次

- [編輯說明](#)
- [章節目次](#)
- [卷目次](#)
  - 001
- [贊助資訊](#)

## 編輯說明

- 本電子書以「CBETA 電子佛典集成 Ver si on 2023 .Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

No. 477 [Nos. 478, 479]  
佛說大方等頂王經(一名維摩詰子問)

西晉月氏三藏竺法護譯

聞如是：

一時，佛遊於維耶離奈氏樹園，與大比丘眾俱，比丘八百，菩薩一萬——一切大聖神通以達，悉得總持、辯才無礙，攝三世慧至三達智，空無相願不中取證，行於大慈、奉無蓋哀，不計吾我以度彼岸；通于三世無去來今，曉一切法如幻、化、夢、影、響、野馬、芭蕉、水泡聚沫，解于三處本無所有從緣對生，有利無利、若譽若謗、得名失譽、若苦若樂，以過世間之所有法，因權方便周旋三塗，以超欲界、色界、無色界，解暢道義救度一切；諸天來侍，諮受深法，開發愚心悉入道明。

爾時世尊，明旦著衣持鉢，入維耶離城分衛，至維摩詰舍。時維摩詰有子，名曰善思，明旦沐浴以香塗身，體著新衣手執蓮華，與妻室俱上樓閣，觀作妓相娛，宿命德本之所感應。遙見佛來，與聖眾俱入城分衛，現大瑞變，以偈語妻，所說雅頌歌佛功德：

「聞斯和雅音，同時今俱作，  
眾妓在其處，速徹樓閣上；  
大雄來不疑，護世演光輝，  
必以足右指，蹈於城門闥。  
百鳥諸禽獸，發哀悲和聲，  
從古未曾聞，如是諸妙響；  
大雄來不疑，欲導利眾生，  
今舉右足指，以安著門闥。  
我今日覩佛，猶寶瓔珞身，  
眾妓不鼓鳴，微妙可悅心；  
三千聖無疑，威德淨莊嚴，  
必以右足指，蹈于城門闥。  
譬如有大鉢，著池河水至，  
則聞調和音，周遍其土地；  
人中天無疑，大聖演尊光，  
佛開導世間，定來入城門。  
神通化眾生，猶樹華茂盛，  
若干色芬葩，流布極美香；  
大龍無所疑，誓願建立本，

今以右足指，安於城門闥。  
普照于虛空，周遍於天地，  
日明為以蔽，永不復現光；  
一切尊無疑，現威大晃耀，  
今以右足指，安於城門闥。  
猶如諸天人，住於虛空中，  
眾庶佛後從，如天侍梵王；  
愍傷世無疑，尊人聖導師，  
今以右足指，安於城門闥。  
今日觀城人，各慈向不恨，  
展轉相示談，如父母子孫；  
德光無沈吟，福威自莊嚴，  
今以右足指，安於城門闥。  
察男女大小，各執若干花，  
叉手而自歸，歡悅遙散花；  
大導無猶豫，德花嚴飾身，  
今以右足指，安於城門闥。  
諸天人間華，遍布于虛空，  
散華而燒香，其香可意悅；  
大勇無疑結，欲入維耶離，  
因化悅大眾，最勝故到此。」

爾時善思妻室，聞說是言心中抱恐，衣毛為豎身內和涼，住於蘭邊心自念言：「是何等神？為天、龍、鬼魅、反足手、真陀羅、摩休勒、人非人耶？口宣人語。」在其處所，不動不搖、不敢移轉。時佛往詣善思童子所居里中，在於舍邊，立在門前。善思童子見佛世尊，即欲下樓閣往自奉迎，心中喜悅不能自勝，已投樓下承佛聖旨，住於虛空以偈歎佛：

「聖慧尊且住，人中雄愍待，  
用哀眾生故，唯受斯水漿。」

於是世尊，為善思說偈言：

「以住真本際，世俗所不達，  
彼際無所有，是為本際相。」

善思童子以偈問佛：

「云何住本際？ 真本際化導，  
無明之猗際， 何謂立虛無？」

時佛復以偈告善思曰：

「其際真本際， 是際則如來，  
如審住本際， 了了住如是；  
如際真本際， 斯則如來際，  
猶了真本際， 童子住亦然。」

善思童子復以偈白佛言：

「無際際何際， 何所是際相？  
以何權方便， 名曰為本際？」

於是世尊， 覩見善思心欲暢了解道無處， 告於善思童子， 以偈報曰：

「無際不可待， 乃曰真本際，  
其際相虛空， 虛空亦無相。」

善思為佛說偈問言：

「甚哉真正處， 其處玄無上，  
使一切眾生， 住如今導師！」

時善思童子前白佛言：「世尊重愍， 受斯蓮華。」佛便受之。善思童子口身發言：「以是功德致無上正真之道， 成最正覺； 為諸眾生班宣經典， 令不得至凡夫之法， 不至道法。」

爾時賢者舍利弗， 亦在會中， 謂善思童子：「於善思心所趣云何？ 所成正覺， 法何所像？ 欲為眾生而班宣之。」

善思以誦答說偈言：

「佛志無所得， 諸聲聞亦然，  
當成斯正覺， 為眾生班宣。  
彼無所向說， 亦復無所致，  
大智當解斯， 本淨明如是。」

過去諸正覺， 護世無上尊，  
亦不得諸法， 導世因滅度；  
計求無法界， 亦無眾生界，  
是則為本際， 世俗所不暢；  
假號曰世界， 人猗相名號，  
亦無諸所想， 更無有異業。」

爾時邠耨文陀尼子，為善思童子說是偈言：

「童子卿云何， 而欲學斯法？  
是處深難逮， 明者所迷惑。  
仁生來久如， 智慧獨勇猛，  
與聲聞談語， 卒對慧無畏；  
處處能分別， 所住像紫金，  
立王路巍巍， 猶虛空月盛。」

時善思童子以偈答言：

「唯仁問所生， 所生無所生，  
諸法無所起， 誰當復生者？  
其法無所生， 自然無所有，  
是曰本清淨， 無法無所得。  
諸法本清淨， 未曾能得是，  
以斯無明慢， 佛故說是法。  
在於仙人野， 第一轉此輪，  
多存聲聞業， 係志在虛空；  
宣暢法音響， 為眾多辯才，  
以權來聖慧， 宣說如審諦；  
有生乃終沒， 斯愚之行無，  
處在顛倒業， 如邠耨所說。  
以生有老死， 是為方俗言，  
其法無言辭， 託假造言教。」

爾時賢者邠耨文陀尼子前白佛言：「至未曾有，世尊！今是善思童子，深入智慧巍巍乃爾，所宣獨步眾所不逮。」

佛言：「如是如是！如邠耨言而無有異也。」時佛告菩薩善思童子：「卿以何故，欲逮無上正真之道，為最正覺乎？」

善思答曰：「聖尊所明故復相問，用最大聖故被弘誓，大聖至仁因宣是語。我身寂然不有所為，以被弘誓悉無罣礙，無所開化爾乃名曰斯深上句。眾生無人亦然，其不或斯是等能度。至賢詳序深妙上句，曉了斯本實際本末，其以無數無有若干，解達深妙無上章句，以用法故化此眾生，其行各異誨無眾生。設無眾生彼一切空，無智智慧眾生本淨，以達本淨無有各異，以解斯義是世明智。唯然聖尊，我蒙解斯，自成正覺為眾說法。」

賢者阿難前白佛言：「至未曾有，是善思童子，辯才乃深入如是乎，乃能宣斯應順妙章，無所著句。天上世間凡庶眾人、阿須輪聞，必當恐怖不肯受學，誰當信樂此深妙法？往昔宿世曾聞學是深遠之行，爾乃信受。」於時阿難以偈歎曰：

「猶如須彌頂， 遠現微妙好，  
今此善思德， 在眾妙如是；  
若如眾山王， 堅住於大海，  
今處斯眾中， 快宣此妙句。  
善思所咨嗟， 說名不有無，  
亦光於本際， 世俗所不觀；  
其辭無所畏， 莫不敬歎者，  
唯善思說之， 云何知本末。」

善思以偈報曰：

「吾以棄身命， 被無罣礙鎧，  
志不貪正覺， 爾乃曰博聞。  
猗欲故墮落， 合集極殃禍，  
誰不墮災者， 唯見世導師。  
是諸佛境界， 護世所持濟，  
其身無所厄， 住於佛尊道。  
虛空及人身， 二俱不可得，  
如法不可得， 法懷無所畏；  
曉虛空佛身， 真實無處所，  
若成是忍辱， 永悉無所畏。  
其虛空至地， 自然無所有，  
是自然善思， 達悉無處所；  
其虛空至地， 善思不可得，  
無生無自然， 虛寂無所有；  
虛空無有高， 亦復無有下，

以解了是法， 彼悉無所畏。」

爾時佛告善思童子：「仁者體性無所畏乎？」白佛：「不也。」  
世尊佛復重問：「卿審不畏乎？」白曰：「不也。」  
佛言：「善哉善哉！仁乃無畏，不懷恐懼。」時佛頌曰：

「從有而生畏， 假現無所有，  
若能解是忍， 爾乃近佛道。  
因人想有畏， 眾生本永無，  
若能解如是， 於斯無所住。  
其不得正覺， 無覺亦如斯，  
若餘無所獲， 此儻無所畏；  
若能曉了斯， 不住有無際，  
善思解如是， 是為由佛道。」

佛告善思：「若有菩薩疾欲永安，逮無上正真之道，為最正覺者，便當消除有常想、安想、苦想、眾生之想、人壽命想，分別解了無所著行，悉無所倚。作是慕業，逮成無上正真之道也。佛往宿世行菩薩業時，作是行道以，便懷來慧無能得法，乃曰佛道。」時佛頌曰：

「解常想猶幻， 計常致生死，  
常無常虛無， 求業無所有。  
眾生有安想， 了不安自然，  
是想為顛倒， 用想有人故。  
若解了法者， 無有各各異，  
則不懷妄想， 無命無有人。  
道明不得由， 無道亦復然，  
是乃曰本淨， 法無所有故。  
若有明達者， 曉有悉本淨，  
善思當解斯， 是為道正道。  
不行于道乘， 佛乘所救濟，  
若有人諍斯， 便不暢道法；  
不行於慧業， 不為道所護，  
用不順此行， 佛法深難解。  
諸法無所法， 本悉無形貌，  
所有亦虛無， 三界永不安。  
計諸樂眾苦， 猶如行虛空，

若能思是行，斯乃心解脫。  
有身云吾我，彼法亦虛無，  
其不有吾我，所知無所有。  
斯等不想命，不得究本末，  
虛無想真實，少明為迷惑；  
吾我及壽命，本淨無所有，  
愚冥之所行，計本淨而有。  
佛道無思議，不念是所有，  
若聞深妙法，不能受奉持。  
未曾有班宣，如是經法者，  
法不可逮得，所說亦無獲。  
坐於佛樹下，因是成道慧，  
若不致道慧，則亦無所知。  
佛道及慧場，亦無有言說，  
凡夫懷望想，慕佛所演法；  
斯則真實教，佛所宣深妙，  
其意覺甚深，是為魔所行。  
若有得聞是，佛所說經典，  
不解經義味，諸法所救護。  
菩薩甚勤苦，不求道安隱，  
於斯無道覺，是二事無像。  
意當倚慕斯，有是佛所說，  
是何此云何，著於顛倒業；  
若有過苦惱，甚著於深妙，  
各稱舉大音，快佛無思議。」

佛復告善思：「學是法者當習深典，勿得志存雜句多辭無益之義，不成正真無極大慧；深遠之法乃曰優奧，是乃應法斯曰無得。眾生墮邪不能行斯，不用三昧可解利義。慧無境界，無慧亦然，當了斯際非智所行。佛往宿世聞是深法，以解寂淨，心無所著。若聞斯典得悅豫喜，曾於無數佛所造行立功勳德，受著心懷、諷誦奉行，以化他人，宣布十方。」

佛復告善思童子：「菩薩當修如是弘誓，世人所在常抱恐畏，勤學至真不當懷懼也；畏難退却當作是解，宣布奉行乃入道慧。」

善思前白佛言：「唯然信樂也，世俗所不信，獨篤無窮，志曠如空，永無所慕。」

佛復語善思：「若菩薩大士志深妙法，斯諸正士以是方便順如佛教，則於道法無所諍訟，以不諍訟，一切諸法則無恐怖，皆不可

斷；一切諸法了之本無，志無所慕，便入道慧。若有聞說一切法有，不以為怖；若說言無，不以為懷。於有無法，不以增損聞：諸法應、諸法不應、諸法精進、諸法懈怠。解是一切十方諸法，慧所歸趣。若無所趣，若復不解諸法有念、諸法無念，不以恐怖；諸法有為、諸法無為，諸法有界、諸法無界，諸法忻喜、諸法無喜，不以恐怖；一切諸法亦不有為、亦不無為，一切諸法本有所有、本無所有，諸法寂然、諸法憤亂，不以恐怖；諸法顛倒、無有顛倒，諸法虛無、真實無為，不以恐怖；諸法一切有戒、無戒，有明、無明，有名、無名，有興、無興，有畏、無畏，有生、無生，有死、無死，不以恐怖；諸法有道、諸法無道，諸法有度、若不滅度，諸法是、非，不以恐怖。所以者何？諸法皆空，虛無不真，猶如幻、化、泡沫、芭蕉、影、響、野馬；夢中所見，本無從來、去無所至；猶如虛空，忽現雲霧塵烟灰等，託現虛空不能為垢，忽然便滅，虛空自然亦無所淨。有道無道世俗慧明，普解自然乃無所著。了無所了，乃應道慧無上正真，無所恐畏心不懷懷。」  
佛於是頌曰：

「諸法無所有， 自然虛不真，  
其自然虛無， 是相便滅度；  
諸法無所淨， 斯亦無所有，  
以了諸法無， 達不有自然。  
所淨訟諸法， 是亦無所有，  
以曉法虛無， 則解不淨訟。  
諸法無所有， 本淨永無形，  
本淨不可得， 亦無所忘失。  
斷一切諸法， 故曰為明智，  
斯謂永毀壞， 亦現無所壞；  
諸法無所滅， 計亦無起立，  
亦多無所壞， 法亦不可得。  
諸法本虛無， 亦不可得見，  
設使無所得， 方便現所有；  
諸法無所有， 因緣從對生，  
所有無所有， 班宣於經典。  
諸法能相應， 示現無所淨，  
不淨為自然， 究竟無有形；  
諸法無所應， 無作不滅度，  
如是不可得， 常離于諸數。  
諸法不可得， 亦無有過去，

甚哉永無實， 乃曰本真際。  
 諸法皆悅豫， 亦不可悅喜，  
 若法不可得， 彼亦無言說。  
 諸法無放逸， 二俱無所有，  
 自然無可取， 是為深妙相。  
 諸法不可知， 無我而自然，  
 以解無志求， 至於自然號。  
 無為無所樂， 彼亦無所有，  
 用有無明業， 因號曰無為。  
 若念於諸法， 究竟不可見，  
 此則真實言， 故名曰意念；  
 不念於諸法， 無住無所歸，  
 了斯無眾生， 是號法中法。  
 一切法猶幻， 其幻無所有，  
 以法無明故， 因宣說生死。  
 諸法無形貌， 是其自然義，  
 若無有諸法， 解脫無解脫。  
 假號曰境界， 自然無境界，  
 愚冥所倚著， 故名曰部界。」

佛復告善思：「色、痛、想、行、識，空本無所有；眼、耳、鼻、口、身、心，空本無所有；地、水、火、風，空本亦無形；因緣合成，猶如五事，成其屋宅。何謂為五？一曰材木，二曰瓦草，三曰土塹，四曰人功，五曰泥水，以是五事乃成為屋。本各別時都無屋名。因緣合成，身亦如是。五陰緣對便有四大，因名曰身。地水火風各緣來合，猶屋四柱四壁皆因緣會，合成散壞皆無處所。猶如夢中見屋宅城郭、樹木華實、流水田地、犁牛諸種，下其五穀，各隨時生，人主用意獲之自給。心神無明，不達一切三界皆空，因倚望求便生意識，十二牽連往來周旋，輪轉無際勞於神識，沈迷五趣無懈怠時。不解本空如夢所見，覺不知處何所歸趣？至成正覺，乃了五趣本無處所，獨步無畏。」

佛於是頌曰：

「色痛想識空， 眼耳鼻口意，  
 本寂無所有， 地水風火異；  
 了界得自在， 班宣無部章，  
 所言上佛土， 其境滅度想。  
 諸法各有形， 本亦無合會，

不曉知空寂，其本無有身；  
無得不可逮，從緣對合成；  
無獲不可致，又現望得生。  
在彼不修戒，亦復不犯禁；  
無行無有戒，是為諸法相。  
諸法無所有，因無明而生；  
以有無明法，便造明達智。  
諸法假有名，是名無所有；  
假號無有法，乃名曰滅度。  
所起無所生，因現有五陰；  
其陰無所見，因號有所現。  
所有無處所，因變示有法；  
法離生死業，長無生死難。  
如幻師化形，愚冥謂有人；  
所有無所有，明者不為迷。  
法生無所生，慧者無是計；  
諸法皆悉空，愚者不解此。  
法適有所生，便當有終沒；  
其生及病死，捨是無所畏。  
諸法一切空，法亦無所歸；  
善思當了斯，是佛所演法。  
正覺無所作，則為不可逮；  
若不得道處，乃見三界事。  
若望想佛道，則不求正覺；  
若行志存道，永不造無想。  
諸生死自然，不觀自然法；  
自然無所有，是為無為想。  
究竟無所生，所說不可得；  
以行無明業，因示無為法。  
以懷來眾義，諸法則自然；  
彼悉無所生，便無諍訟事；  
彼無不奉行，所宣深妙法；  
用一切起生，菩薩行愍哀。」

爾時善思以偈答世尊曰：

「佛興出現世，皆用愍我等，  
身以為疑網，宣布是法義。」

佛出無思議， 為具足興變，  
以壞魔羅網， 說除六十二；  
以絕生死元， 因坐佛樹下，  
永無有沈吟， 宣消眾想著；  
解暢虛偽業， 能仁滅諸見，  
勇猛為世俗， 斷我眾狐疑。」

爾時世尊告善思童子：「菩薩所行未曾虛妄，多所救護，以恩加濟，無有諍訟，除去眾瑕一切無穢，愍傷眾生行深遠義，不懷妄想，世無堅固消去貪欲，以無貪欲蠲棄眾結，常行等心加於眾生，志不虛妄，大慈之行法不可得，修大義吼不捨精進，心行至真不失勤業，無有憍害奉行忍辱而不諍訟，無所覩見夙夜尊行；善思一心棄于懈怠成就道行，定意正受其心寂靜，修於善慧，一切諸法永無所得，行無所畏心不怯羸，顯發道心行無罣礙，成就如來十種之力，當以何行至殊特業，尊其至慧奉無等倫，遊於十方諸佛世界，行無罣礙度脫一切。」

時佛頌曰：

「行無虛妄業， 是諸菩薩辭，  
以奉於脫門， 不畏諸礙行。  
無行謂正行， 是菩薩之業，  
若能解是行， 則無所貪求；  
以法救攝之， 諸菩薩所宣，  
其無所得義， 是行為無上。  
言吾行道法， 則住於顛倒，  
以住顛倒業， 便得有所畏；  
假使有諍訟， 不見諍所在，  
明者作是達， 行於無上乘。  
是乘無所畏， 大乘最無極，  
畏與無所畏， 是亦無放逸；  
一切無所有， 眾行中最勝，  
設了悉虛靜， 彼行無上道。  
斯行甚微妙， 救護一切法，  
所濟亦深遠， 消除眾妄想；  
所行邈玄妙， 二俱無處所，  
若能知本際， 不倚念於法。  
法永無眾垢， 亦不離垢去，  
是法本清淨， 反宣捨於欲；

而示現邪逆， 愛欲不堅固，  
不轉文字業， 斯句為無上。  
不著猶如幻， 此則無言教，  
以棄反倒行， 便無諍訟意；  
一切眾生行， 是實不可得，  
若能曉了斯， 此行乃善教。  
眾生以無明， 故曰名黎庶，  
眾生法亦爾， 是道則無上。  
其念及眾生， 是永不可得，  
此為第一慈， 歎慈乃無極；  
是曰世大施， 斯乃為大士，  
常慕樂放捨， 乃曰慧道心。  
正使不得法， 諸法虛無實，  
云菩薩明達， 是曰好布施；  
解法不可得， 便無所恐懼，  
無尊是之法， 乃曰為布施。  
法貌不可獲， 佛法不可思，  
是戒無所犯， 諸法無所著；  
佛土不可議， 此不見諸界，  
於戒不望想， 諸菩薩所歎。  
能忍諸眾生， 一切不可得，  
佛所教訓誨， 是法第一忍。」

佛復告善思：「色空不可得，痛、想、行、識空亦不可得；所謂空者，色則為空，無復異空，痛、想、行、識空，無復異空，四大、五陰、十八諸種、三界本空，十二因緣無則為空，無復異空。現世度世、有為無為，四大皆空，無復異空。色如聚沫、痛痒如泡、思想如芭蕉、生死如夢、識如幻、三界猶化、五趣如影，所以如影，從緣對生。三界本末，欲界、色界及無色界，心意所為，猶如畫師治素壁板，因緣合成。猶如飛鳥飛行空中，菩薩如是，行無望想，旋到十方；猶日宮殿行於虛空，不污眾冥，菩薩如是，獨步三界心無所著；去婬、怒、癡三毒窈冥，猶如蓮華生於泥中不與其合，菩薩如是，在於生死，成最正覺，心淨如空，永無所著度脫一切。」佛時頌曰：

「其心不可得， 則無有諍訟，  
若不得眾生， 是為第一忍。  
菩薩離懈怠， 其志無所行，

永無所勤修， 乃曰最精進。  
其身及心意， 所遣直無邪，  
菩薩無所說， 是第一精進；  
若有懈怠者， 菩薩化立之，  
無心無所行， 住第一精進。  
其心不可得， 內外無所著，  
若心不可逮， 是則為定意；  
心常自勤修， 自然無所有，  
無思無正受， 乃曰逮三昧；  
所以言定意， 以能作是行，  
安住名自然， 是第一定意。  
不知慧所在， 何所自然法，  
自然及與慧， 二俱無所有；  
是法不可得， 斯識行正法，  
不以識知法， 自然無所有。  
若有了此行， 菩薩意堅強，  
行第一之義， 世所無所趣。  
眾會無等倫， 為眾而宣法，  
斯等雖遊居， 無眾生望想。」

佛復告善思：「一切諸法猶如幻化，幻化本空悉無所有，迷惑愚俗自計己身及與他人，悉有所有故沈五趣，敢能曉了是悉無所畏；諸法本末無有內外，以了如是心不怯弱。不難三界三界悉空，若有菩薩曉是本無，獨步三世而無所難，達於生死猶如虛空，無形本亦無名，一切諸法亦復如是無形無名。用無明故馳逸三界，轉輪無際，猶如五事住於虛空不能為垢。自然之故心本清淨，權未即解便有三毒，五陰六衰客塵所蔽，雖有是非不污本淨，心亘開達，暢三世空便入大道。」

佛時頌曰：

「眾生猶如幻， 其幻無所有，  
所宣如是者， 永無所復畏；  
己身與他人， 二俱虛無寂，  
以能曉了是， 則永無所畏。  
其內及外法， 不計有所在，  
無以怯弱心， 不難於世俗。  
諸法無所礙， 猶如旋虛空，  
所至如虛空， 是法為自然。」

若能曉了斯， 菩薩無所畏，  
分別一切法， 解了眾生行；  
彼不得眾生， 其法皆如是，  
以剖判諸界， 其界無所有；  
是曰入道行， 斯曰無上道，  
以致此至業， 知眾生心行。  
諸界及眾生， 二俱無所有，  
以念彼如是， 皆了一切法；  
其內及外事， 無合會望想，  
以為不除法， 乃曰真本際。  
斯法無思議， 乃曰為佛法，  
此悉無所有， 悉亦無所成；  
所行能如是， 計數無有人，  
以無為之慧， 乃曰為佛慧。  
是乘為大乘， 普安於一切，  
永不畏此世， 世亦無所有；  
其在於世界， 普世一切界，  
菩薩無所行， 求於無上慧；  
是法為深遠， 佛法不可思，  
若法無可獲， 是則近佛道。  
其佛及經法， 此一切悉無，  
若行如是者， 則得近佛道。  
以行如是者， 俗人無與侶，  
其心無所著， 彼乃近佛道。」

佛復告善思：「若有菩薩大士聞是深經，若讀持諷誦，心不恐怖，善被弘誓心如金剛，疾近佛樹坐於道場，近佛境界得親至真，無礙脫門，觀于無為無合會處，到於十方諸佛世界，建習大慈無蓋道哀，成十八不共諸佛之法，三世最尊慧喻日月，德無等侶慧過虛空，道明巍巍不可為喻，逮無邊聖無見頂相。若有聞是無限雅典，以斯深卷為人班宣而信樂者，往過去世曾見諸佛亦不可計。又不輕慢戲笑之者，佛以豫見觀其人本，早信此經如來久覩。若不信樂習斯經典，聞之調戲，則外異學、諸魔官屬、放逸之人也。信是法者是佛弟子，佛則是師為親成就，下其鬚髮而作沙門；其不信者則外邪業，九十六種反逆道法。」  
佛時頌曰：

「見佛坐樹下， 行於真道場，

其不信佛道，是慧不可得。  
其無罣礙法，究竟不可得，  
了法無處所，是曰為解脫。  
意入於聖慧，一切法之王，  
諸法及道慧，非佛之所宣。  
有為及無為，愚所發望想，  
諸菩薩無想，諸佛大聖明。  
普觀於斯世，世悉不可得，  
所用曉了世，是亦無處所。  
佛聖及眾生，於是無望想，  
其無思想者，善哉慈無上。  
假使眾生界，法界亦復然，  
是乃名之曰，菩薩無所著。  
以觀於悲哀，其哀無形貌，  
其哀以無貌，非愚所了行。  
五事在虛空，不有無處所，  
一切俗如是，是乃無上哀。  
其無上正法，乃曰為佛法，  
此無所貪世，是為自然法；  
護世之所照，其色無所有，  
以是無色法，乃曰無見頂；  
虛空無有邊，普平不可獲，  
是為佛正法，名曰無能觀。  
其慧不可逮，是無上大道，  
慧以不可得，斯無有堅固。  
此際及彼岸，所見若不見，  
深解不行斯，是非妄想求。  
念是智慧法，斯法則平等，  
違此佛教法，則非善親友；  
無勤若勤度，乃曰到虛妄，  
其不行平等，則非善親友。  
以發興斯法，若復滅斯法，  
此等諸比丘，不善思佛教；  
以能斷眾苦，本淨無所有，  
如是說法者，則班宣佛教。」

佛復告善思：「若說諸行皆從習致，用三界習故修道習，有計吾我故行大慈，修無蓋哀，倚於三界行三脫門，慕四大故，行無常、

苦、空、非身，以生老病死求四無畏，用十二因緣了十二部經，以十八種行十八不共諸佛之法，用十方眾犯十惡故，行十善求十種力，用三弊故致三達智，著六情故行六度無極，六通獨步，應病與藥使濟危厄。佛猶良醫經法如藥，用疾病故而有醫藥，無病則無藥，一切本空，無形無名亦無假號，心等如空無比無侶，忽然無際，爾乃應道。」

佛時頌曰：

「其無所住法， 於中習所行，  
班宣修消除， 去佛法大遠；  
若於斯寂法， 造虛妄思想，  
以虛妄之法， 不親近滅度。  
其宣於諍訟， 斯為之滅度，  
善思當了是， 斯無正見行；  
若有修行道， 宣布反逆事，  
朋友亂顛倒， 是為學者業。  
佛所演講說， 菩薩大名稱，  
當來諸就學， 故勸化行道。  
若有奉持是， 佛所化深妙，  
用一切眾生， 以為供養佛；  
若有明智者， 受持是真法，  
斯等將來世， 用正法存立。  
其不行是法， 心立存思想，  
自謂則應慧， 不用餘致道。」

佛說是經時，善思童子，尋時逮得無所從生法忍，忻然大悅湧在虛空，去地四丈九尺。時佛忻笑，五色光明巍巍甚妙，青黃赤白紅紫之色從佛口出，照於十方無量佛土，還繞佛三匝從頂上入，六反振動是三千大千世界，上虛空中，天雨細擣栴檀香、木蜜眾香，雨天好華晃耀人目，箜篌樂器不鼓自鳴，莊嚴虛空周匝十方靡不校飾。此三千大千世界，羅列諸寶交露屈奇，妙帳高閣樹木，流水浴池，五音俱發和雅悲哀，聞見此變莫不悅豫得未曾有。賢者阿難即從坐起，偏露右臂更整衣服，長跪叉手前白佛言：「以何緣笑？既笑當有意。」以偈歎佛：

「聖尊未曾妄， 大明不虛忻，  
慈愍世雄說， 何緣而忻笑？  
天處虛空中， 供養人中上，

各口而歌詠， 快哉宣經典。  
如高燈電光， 若干色微妙，  
斯耀亦如斯， 光光照遠近。  
如諸佛之法， 授與正道決，  
還繞身三匝， 忽沒於頂上；  
聖尊笑輝耀， 若干種光色，  
出佛口入頂， 唯說此瑞意。」

爾時世尊，為賢者阿難說頌曰：

「善思族姓子， 造立德無量，  
當成如來覺， 逮致天人尊。」

佛語阿難：「是善思童子，當值不可計會億姦兆佛，世世隨侍未曾遠之，常用至心供養諸佛，衣被飯食、床榻臥具、病瘦醫藥；佛滅度後供養舍利，興眾寶塔高四萬里，以持舍利著眾寶塔奉事供養，以好名香眾華衣服、眾妙若干種寶、伎樂幢幡、栴檀雜香，以解脫華及眾繒綵，以用供事諸如來、至真、等正覺。最後末世當得佛道，號無垢光如來、至真、等正覺、明行成為、善逝、世間解、無上士、道法御、天人師、佛、世尊。」

爾時大聖，即說頌曰：

「若以眾雜寶， 充滿十方界，  
以用施諸佛， 護世眾如來；  
若聞是經典， 德多過彼施，  
住力講說法， 護世照三界。」

爾時舍利弗聞佛所說，歡喜心悅得未曾有，念佛至聖德踰須彌，慧超三世，道不可比如空無侶，探古知今所覩無限，智明曠然無以為喻，救厄通明猶空無際一切蒙慈。時舍利弗，念佛恩德恭恪說偈，而歎頌曰：

「是經甚微妙， 護世之所宣，  
不說其名號， 云何知其稱？  
古來未曾聞， 班宣於斯法，  
彼不得住處， 甚哉說法快。  
假使有漏法， 及與無漏法，  
計亦無所得， 甚哉快說法。」

若令有為界， 及與無為界，  
斯二無所積， 是經歸如斯。  
護世宣妙法， 道行正真教，  
覩不得處所， 此經義如是。  
所說諸佛法， 於斯無所歎，  
吾我不可得， 甚哉快說經。  
設使十方世， 自然無所有，  
護世之所宣， 未及此經趣。  
唯愍世宣之， 人中最願演，  
班宣是經名， 今所未稱號。」

佛告舍利弗：「是經名『頂王』，當共傳號。大智當了，所以名頂王。如須彌頂皆見四天下，解是經慧，得四無畏無上大道，無生老病死，度三界厄，若世人好喜是法，十方靡不蒙濟，故名頂王。常奉持斯，若有持此佛所宣經，當為世護諸天人民百萬億眾，興無數德無上正真，不為緣覺及與聲聞。若宣是法，必得成就無極世護，以得聞法深難究暢，處處演義，解了是法深奧無上，當得成佛。以能奉持，於一切法無復狐疑。若受斯經所宣至化、所喻頂王，不但當得第一法忍，第二第三具三忍法。其法不可得，道無處所無所光顯，乃布大道於一切法。此人無欲現在無求，若持是經佛所班宣頂王言辭，諷誦化人福不可量。若有女人受持斯經，以行智慧疾得殊勝，捨女惡態知一切一，以知眾一便持是法，班宣斯經入諸行業，明了一切諸所歸趣。以入此法說多所照，知若干品所行精進，無數眾人悉受道教，本空無法所可班宣，皆無處所悉不可得。所以者何？本末空故。從古以來義不可逮，一切法然，奉持是門法無可得，則不有無是本淨法，乃名執持。其慕斯光無量普明，當以隨時講是《頂王》，廣求法界志斯光日，不得境界乃曰執持。諸法甚深法不可得，若不可得則不有無，辯才具足志存佛道，覺亦若斯。以暢經義無卷無形，如龍化生，先興其雲然後乃雨。心無從來因緣合成，斯慧無形是無思議，若欲宣布無央數法，當學斯經。解一切空，無所著法，思惟經典不知從來，所說甚善。斯法無生如經所傳，其光玄照猶如日明，光無從來去無所至。經典如是，照諸所有令無所有。若有比丘執持辯才清淨無斷，當以至心學是《頂王》，因法光明所耀無量諦廣布法，疾得逮入無礙辯才。以學《頂王》饒益世俗，其不學此不知法味；無玄妙典《頂王》無上，若不奉是遠佛法教。

「諸比丘眾、若比丘尼，若不從是法典訓誨不歸義趣，其不求是不至正真。若有比丘、比丘尼求歸是法，為一切世而作法因，一切諸

法悉不可喻。猶如有人住忉利天，處天宮殿悉見天下。學斯經者，普超眾生濟度一切，若住須彌頂，在於其上觀察天下。斯經如是，解暢諸法觀一切無，開導眾生。猶如有人執大炬火，入于冥室消除窈冥；斯經如是，以法光明普照諸法，習持是典未曾遭冥。猶如日光，出照天下靡不周遍；斯經如是，以道法明咸耀三界，一切眾生示以道慧。猶如月殿，遊行虛空而不休廢；斯經如是，照十方界一切蒙荷。是則法印印一切法，建立此印為諸菩薩。又計其印，猶如虛空悉無所有不可令有，虛空及印是二無望。佛與正法亦復如是，班宣是經亦無所說；猶如國王所愛敬子，欲立太子任以國財。

「王告大臣：『以是洪業付其太子，又斯聖財天下國土，一切萬民委任係後。』諸臣奉命。今斯經法亦復如是。善思童子從佛啟受，當以授與無數菩薩使人上法，佛以建立是經法要，諸菩薩故也。熾盛德本，若以手執福不可量，其持是經所宣頂王，不當疑是不成正覺。欲逮辯才於一切法而無所著，當學斯經所宣頂王。所云世法是則正道。所以者何？俗人信道，若入此經或復不信，用聞經恩會久成道。若受是經廣為人說，皆謂至賢，普世諸人莫能虛欺，解諸佛法饒益眾生，世護無上，若說是經，諸天億千住於虛空，而嗟歎言：『善哉正覺！所宣甚哉！難及難及。』乃說妙典，是舉道英慧英，所益不可思議。若四句誦為人講說，若復精學無央數經，以是深法不可思議，廣為人說，其人蒙慈，為與佛談愛樂聖典，以為宣傳斯頂王法，訓誨經典無上道要，是乃名曰不可思議。」

佛告阿難：「若有奉受如是像法純淑經卷，持諷誦讀，若有比丘、比丘尼、清信士、清信女，能從啟受持諷誦讀，其德無量功不可限，莫能稱載得崖底者，猶如虛空不可得際。如是，阿難！若受是經雖不能多，受四句頌諷誦宣布為他人說，福不可計德無崖底，無邊無際不可為喻。」

佛爾時頌曰：

「虛空尚可度， 眾想可窮說，  
斯功德福祐， 不可竟盡極。  
奉十方世界， 諸無上護世，  
若有受持是， 為供斯諸佛。  
若觀諸神通， 舉十方世界，  
不如聞此經， 普奉是諸佛。  
其於十方世， 棄捐第十業，  
以斯奉事佛， 聞不如供養。  
若供諸滅度， 及當來正覺，  
於今十方土， 現在天人尊；

一切有為業， 歸大仁師子，  
若持是經卷， 正覺所宣說。  
若以衣食養， 斯非精智慧，  
其有持是業， 此慧供無上。  
一切十方世， 滿中眾珍寶，  
以施諸正覺， 是福不殊特；  
其有學是經， 頂王所班宣，  
斯供養諸佛， 是所宣第一。  
我所宣經典， 不著諸佛道，  
其心倚於是， 欲供養如來；  
其不倚世俗， 是第一奉事，  
都無舉無下， 是乃曰供養。  
其佛正覺法， 一切不可得，  
如來所班宣， 是第一禮敬；  
其定光諸佛， 所供養奉事，  
見諸菩薩法， 是第一供養；  
是供養第一， 如奉佛世尊，  
從其授決已， 當得致正覺。  
欲住於佛道， 正覺眾生尊，  
習是清淨法， 則供養導師；  
以如是供養， 得道無所至，  
愍眾生奉法， 皆趣一切慧。  
十方諸佛法， 護世所敷演，  
是皆歸趣正， 是第一供養。  
已得入佛界， 佛慧不可議，  
便能師子吼， 亦如我今日；  
因其師子吼， 在諸法勇猛，  
濟脫億載眾， 滅度無有漏。」

佛復告善思：「受斯經典宣布十方，一切受持奉行正法，無極大慧開示同學，令得習行六度無極救於三界。若族姓子及族姓女，受是經典為他人說，德不可量，猶如虛空不可限度。」

佛說如是，善思童子一切聖眾，諸天龍神、諸阿須倫、世間人民，聞佛所說莫不歡喜，作禮而去。

佛說大方等頂王經

---

## [CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

## [前往捐款](#)

---

### 劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

---

### 線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

### [線上信用卡 / PayPal 贊助](#)

---

## 支票捐款

支票抬頭請填寫「財團法人佛教電子佛典基金會」。

For donations by check, please write the check to  
"Comprehensive Buddhist Electronic Text Archive  
Foundation".

---